



SARAJEVOGAS d.o.o. SARAJEVO

Kantonalno javno komunalno preduzeće za snabdijevanje prirodnim gasom

SaGas 
Eko projekat

P R A V I L N I K

**o uslovima i postupku zaključivanja ugovora sa privrednim subjektima
koji rade na izvođenju i održavanju unutrašnjih gasnih instalacija**

Sarajevo, maj 2017. godine

Na osnovu Uredbe o snabdijevanju prirodnim gasom Kantona Sarajevo („Službene novine Kantona Sarajevo“, broj: 22/16), Pravilnika o preuzimanju i primjeni tehničkih propisa za oblast projektovanja, puštanja u pogon, eksploatacije i održavanja postrojenja i instalacija prirodnog gasa („Službene novine Federacije BiH“, broj: 83/08, 4/12 i 83/15) i na osnovu člana 29. Statuta Kantonalnog javnog komunalnog preduzeća za snabdijevanje prirodnim gasom „Sarajevogas“ d.o.o. Sarajevo, na prijedlog Uprave Preduzeća, Nadzorni odbor na sjednici održanoj dana _____2017. godine, donio je

P R A V I L N I K

o uslovima i postupku zaključivanja ugovora sa privrednim subjektima koji rade na izvođenju i održavanju unutrašnjih gasnih instalacija

I OPĆE ODREDBE

Član 1.

Pravilnikom o uslovima i postupku zaključivanja Ugovora sa privrednim subjektima koji rade na izgradnji i održavanju unutrašnjih gasnih instalacija (u daljem tekstu: Pravilnik) utvrđuje se podjela radnih područja, uslovi koje mora ispunjavati privredni subjekt koji je registrovan za izvođenje radova na izgradnji i/ili održavanju unutrašnjih gasnih instalacija (u daljem tekstu: privredni subjekt), postupak podnošenja zahtjeva za dodjelu radnog područja, postupak komisijske provjere, priprema i zaključivanje ugovora o saradnji između KJKP Sarajevogas d.o.o. Sarajevo (u daljem tekstu: distributer) i ugovornog izvođača, postupak prijave i kontrole izvođenja radova kao i mjere koje će biti poduzete u slučaju da se ugovorni izvođač prilikom izvođenja radova ne pridržava tehničkih propisa, pravila struke, odredbi ugovora i uputa distributera.

Član 2.

Ugovorni izvođač za radove na izgradnji i održavanju unutrašnjih gasnih instalacija, u smislu ovog pravilnika, je privredni subjekt koji je registrovan za obavljanje ove djelatnosti u skladu sa važećim propisima, ispunjava uslove propisane ovim pravilnikom i ima zaključen ugovor sa distributerom.

Član 3.

Ugovor, u smislu ovog pravilnika, zaključuje distributer sa privrednim subjektom za radove na izgradnji i održavanju unutrašnjih gasnih instalacija na području gasnog sistema Kantona Sarajevo.

II PODJELA RADNIH PODRUČJA

Član 4.

(1) Radna područja na izgradnji i održavanju unutrašnjih gasnih instalacija su:

A - izgradnja, rekonstrukcija i održavanje gasnih instalacija koje se priključuju na distributivnu gasnu mrežu preko mjerača ne većeg od G 6, nazivnog prečnika do NO 65 i pritiska do NP 1, iza glavnog zapornog organa izuzimajući ugradnju uređaja za regulaciju pritiska i mjerenje potrošnje gasa.

B - izgradnja, rekonstrukcija i održavanje unutrašnjih gasnih instalacija iza glavnog zapornog organa bez ograničenja veličine mjerača, nazivnog prečnika i pritiska, izuzimajući ugradnju uređaja za regulaciju pritiska i mjerenje potrošnje gasa.

(2) Ostali radovi koji su u nadležnosti distributera mogu biti povjereni ugovornom izvođaču odnosno, privrednom subjektu koji bude ispunjavao posebne uslove propisane tehničkim pravilima za predmetne poslove.

III USLOVI KOJE MORA ISPUNJAVATI PRIVREDNI SUBJEKT ZA DODJELU RADNOG PODRUČJA

Opći uslovi

Član 5.

Prilikom podnošenja zahtjeva za dodjelu radnog područja privredni subjekt prilaže ili daje na uvid dokaze na osnovu kojih se može utvrditi ispunjenje sledećih općih uslova:

- izvod iz sudskog registra o registraciji preduzeća ili odobrenje za obavljanje registrovane djelatnosti, ne starije od šest mjeseci na dan podnošenja zahtjeva,
- uvjerenje o podacima registrovanim u matičnoj evidenciji Federalnog zavoda PIO/MIO za uposlenike, ne starije od šest mjeseci na dan podnošenja zahtjeva (na uvid),
- uvjerenje o poreskoj registraciji, ne starije od šest mjeseci na dan podnošenja zahtjeva,
- potvrdu ili uvjerenje da nema neizmirenih obaveza po osnovu plaćanja direktnih i indirektnih poreza, ne starije od šest mjeseci na dan podnošenja zahtjeva.

Posebni uslovi

Član 6.

(1) Privredni subjekt ispunjava uslov stručne osposobljenosti za dodjelu radnog područja A i B iz člana 4. Pravidnika ukoliko za odgovornu osobu za izvođenje radova ima stalno zaposlenog diplomiranog mašinskog inženjera sa položenim stručnim ispitom i najmanje jednog zaposlenog kvalifikovanog montera gasnih instalacija ili kvalifikovanog montera centralnog grijanja sa radnim iskustvom od najmanje jedne godine na izvođenju i održavanju gasnih instalacija za kojeg može dostaviti dokaz o poznavanju tehničkih pravila za izvođenje radova iz radnog područja A i B.

(2) Uz zahtjev za dodjelu radnog područja privredni subjekt prilaže odgovarajuće dokaze o ispunjenju svih uslova iz prethodnog stava ovog člana.

Član 7.

(1) Privredni subjekt ispunjava uslov stručne osposobljenosti za dodjelu radnog područja A iz člana 4. Pravidnika ukoliko za odgovornu osobu za izvođenje radova ima zaposlenog VKV plinoinstalatera ili VKV montera centralnog grijanja sa položenim ispitom o poznavanju tehničkih pravila za gasne instalacije.

(2) Uz zahtjev za dodjelu radnog područja privredni subjekt prilaže odgovarajuće dokaze o ispunjenju uslova iz prethodnog stava ovog člana.

Član 8.

Pored dokaza o ispunjenju uslova iz člana 6. i 7. Pravidnika, uz zahtjev za dodjelu radnog područja privredni subjekt obavezno prilaže i dokaze o kvalifikaciji radnika:

- Certifikat da je zavarivač osposobljen u skladu sa standardom BAS EN 287 i/ili dokaz o osposobljenosti radnika za izvođenje gasnih instalacija PRESS spojem i/ili dokaz o završenoj obuci za postavljanje gasnih instalacija primjenom drugih dozvoljenih tehnologija,

- Potvrde (ili uvjerenja) o poznavanju i rukovanju eksplozivnim materijalima, zapaljivim tečnostima i gasovima za sve radnike koje će angažovati na postavljanju i održavanju gasnih instalacija i opreme.

Član 9.

Smatrat će se da privredni subjekt ispunjava uslov materijalne opremljenosti ukoliko raspolaže pripremnom radionicom, opremom i alatima koji su neophodni za kvalitetno izvođenje radova u radnom području iz člana 4. ovog Pravilnika za koje podnosi zahtjev, kao i opreme za vršenje ispitivanja gasnih instalacija u skladu sa tehničkim pravilima G 600 i G 459/I.

Član 10.

Smatrat će se da privredni subjekt ispunjava uslov organizacijske opremljenosti ukoliko:

- osigurava jednostavan i pouzdan kontakt sa distributerom gasa i korisnicima gasnih instalacija;
- u skladu sa članovima 6., 7. i 8 ovog pravilnika te potpisanim ugovorom na svakom gradilištu imenuje odgovorno lice za izvođenje radova;
- vrši dodatno stručno obrazovanje zaposlenih u domenu djelatnosti redovnim praćenjem edukacija za obnovu znanja i kurseva za upoznavanje sa novim propisima i tehničkim pravilima;
- izjavi spremnost za rad na zahtjev distributera, posebno u slučajevima opasnosti;
- posjeduje aktuelne verzije relevantnih zakona i propisa, tehničkih pravila i poznaje procedure distributera.

IV POSTUPAK PODNOŠENJA ZAHTJEVA I DODJELA RADNOG PODRUČJA

Član 11.

- (1) Distributer definiše obrazac zahtjeva za dodjelu radnog područja i opis potrebne dokumentacije kojom privredni subjekt može dokazati ispunjenje uslova za određeno radno područje iz člana 4. ovog Pravilnika.
- (2) Privredni subjekt pisanim obraćanjem podnosi zahtjev za dodjelu radnog područja.
- (3) Zahtjev sa priložima se dostavlja na protokol distributera sa naznakom „ZA KOMISIJU ZA DODJELU RADNOG PODRUČJA“.

Član 12.

- (1) Komisiju za dodjelu radnog područja (u daljem tekstu: Komisija) čine dva predstavnika distributera, jedan predstavnik udruženja za gas i jedan predstavnik ugovornih izvođača.
- (2) Predsjednik Komisije i njegov zamjenik se imenuju iz reda članova Komisije ispred distributera.
- (3) Distributer pisanim putem obavještava Udruženje za gas i predstavnika ugovornih izvođača u kojem vremenskom roku trebaju izabrati i dostaviti prijedlog svog predstavnika za člana Komisije.
- (4) Istekom vremenskog perioda iz prethodnog stava ovog člana Uprava distributera imenuje Predsjednika i članove Komisije za dodjelu radnog područja na mandatni period od dvije godine.

Član 13.

- (1) Ukoliko u predviđenom roku subjekti iz člana 12. stav 3. ovog Pravilnika ne dostave pisane prijedloge, distributer imenuje nedostajuće članove Komisije iz reda svojih radnika.
- (2) Imenovani članovi Komisije iz prethodnog stava ovog člana mogu obavljati poslove iz domena rada Komisije sve do prijema pisanog prijedloga za imenovanje člana Komisije ispred Udruženja za gas i/ili prijema pisanog prijedloga reprezentativnog predstavnika ugovornih izvođača za imenovanje člana Komisije ispred ugovornih izvođača.
- (3) Predstavnik ugovornih izvođača stiče status reprezentativnog predstavnika za člana komisije ukoliko uz prijedlog aplikacije dostavi pisanu saglasnost sa najvećim brojem prikupljenih potpisa (minimalno 1/3) ugovornih izvođača sa aktuelne liste ugovornih izvođača.
- (4) Sjednice Komisije saziva Predsjednik Komisije, a Komisija može punopravno donositi odluke ukoliko sjednici prisustvuju najmanje tri člana.
- (5) Komisija donosi odluke većinom glasova prisutnih članova.

Član 14.

- (1) Komisija provodi postupak obrade zahtjeva privrednog subjekta i sačinjava prijedlog za zaključivanje ugovora o poslovnoj saradnji (u daljem tekstu: Ugovor) u roku od 30 dana, a najkasnije 60 dana od dana prijema zahtjeva.
- (2) U postupku obrade zahtjeva obavezan je izlazak Komisije na adresu podnosioca na kojoj se nalazi poslovni prostor privrednog subjekta sa radionicom za pripremu, u roku od 10 dana, a najkasnije 30 dana od dana prijema zahtjeva.
- (3) Nepotpuni zahtjevi privrednih subjekata neće se uzeti u razmatranje, o čemu će komisija zaključkom obavijestiti podnosioca.
- (4) U slučaju da komisija pregledom dokumentacije utvrdi da je zahtjev potpun, a priložena dokumentacija nejasna, obavještava podnosioca i daje rok od 15 dana za otklanjanje nejasnoća. Ukoliko privredni subjekt u ostavljenom roku ne postupi u skladu sa prethodno navedenim, Komisija će svojim zaključkom zahtjev odbaciti kao nepotpun.
- (5) Komisija o svom radu sačinjava zapisnik, u kojem se obavezno evidentiraju činjenice o priloženim dokazima za ispunjenje uslova za dodjelu radnog područja.

Član 15.

- (1) Ako Komisija utvrdi da su ispunjeni svi uslovi za dodjelu radnog područja priprema ugovor koji potpisuju direktor distributera sa jedne strane i ovlašteni predstavnik privrednog subjekta sa druge strane.
- (2) Ugovorom se posebno definišu: opis radnog područja, postupak prijave izvođenja radova na adresi investitora i podnošenje zahtjeva za pregled izvedenih radova.
- (3) Nakon potpisivanja Ugovora od strane ovlaštenog lica privrednog subjekta isti stiče status „ugovornog izvođača“ i uvodi se u Listu ugovornih izvođača.

(4) Listu ugovornih izvođača radova vodi distributer i dostupna je na web stranici preduzeća svim zainteresovanim subjektima.

Član 16.

(1) Ukoliko privredni subjekt prvi put stekne status ugovornog izvođača trajanje poslovne saradnje sa distributerom gasa se ograničava na period od jedne godine.

(2) Prije isteka ugovornog perioda iz prethodnog stava, ugovorni izvođač je obavezan da podnese ponovni zahtjev za zaključenje novog ugovora.

(3) Zahtjev se podnosi u roku od 30 dana prije isteka ugovora.

(4) Obrada zahtjeva iz prethodnog stava ovog člana se vrši na način i po postupku koji je propisan u članu 14. i 15. Pravilnika.

(5) Naredni ugovor sa istim ugovornim izvođačem može se zaključiti na period od tri godine.

V POSTUPAK PRIJAVE RADOVA I KONTROLE RADA UGOVORNOG IZVOĐAČA

Član 17.

(1) Ugovorni izvođač je obavezan da prijavi distributeru planirani početak radova u cilju dobivanja saglasnosti za izvođenje nove i rekonstrukciju postojeće gasne instalacije sa tačnim navođenjem datuma, adrese i vremena izvođenja radova minimalno 24 sata prije početka izvođenja radova (Dodatak 1: Prijava izvođenja radova).

Izdavanjem potvrde o prijemu potpisane i ovjerene prijave za izvođenje radova Distributer je saglasan da ugovorni izvođač može početi sa radom prema navodima u prijavi o izvođenju radova.

(2) Ukoliko ugovorni izvođač dobije odobrenje distributera za izvođenje radova na montaži opreme za regulaciju pritiska i mjerenja potrošnje gasa, obavezan je da obavijesti distributera gasa o planiranom početku izvođenja radova minimalno 24 sata prije početka izvođenja radova. (Dodatak 3: Prijava izvođenja radova).

(3) Ugovorni izvođač/serviser gasnih aparata kojeg je angažovao vlasnik/korisnik unutrašnje gasne instalacije, može ukloniti plombu sa ventila ispred gasnog aparata i izvršiti puštanje u pogon gasnog aparata nakon otklanjanja nedostataka zbog kojih je plomba postavljena, uz obavezu da to zapisnički konstatuje i primjerak zapisnika dostavi distributeru gasa najkasnije u roku od 48 sati nakon završetka radova.

(4) Ukoliko ugovorni izvođač prilikom izvođenja radova utvrdi da na predmetnoj adresi postoje eventualni kvarovi ili nedostaci koji su iz domena rada distributera gasa obavezan je da to odmah prijavi distributeru gasa i poduzme mjere za otklanjanje opasnosti do dolaska stručnih lica distributera.

(5) Završetak izvođenja radova ugovorni izvođač prijavljuje distributeru gasa u pisanoj formi (Dodatak 2: Prijava završetka radova).

(6) Ukoliko distributer gasa vrši kontrolu ispitivanja na čvrstoću i zaptivenosti gasnih vodova, ugovorni izvođač je dužan da za ispitivanje osigura eventualno potrebnu pomoćnu radnu snagu i neophodnu opremu.

- (7) Puštanje u pogon unutrašnje gasne instalacije vrši isključivo distributer gasa u prisustvu vlasnika/korisnika, ugovornog izvođača radova i servisera gasnih aparata.
- (8) Ugovorni izvođač je obavezan da vlasnika/korisnika u pisanoj formi upozna sa Uputstvom o rukovanju i održavanju gasnih instalacija i uređaja.
- (9) Izvođenje novih instalacija, sanacija ili rekonstrukcija postojećih gasnih instalacija izvodi se prema važećim propisima i tehničkim pravilima za gasne instalacije.
- (10) Prilikom izvođenja radova ugovorni izvođač je obavezan da se pridržava važećih propisa o građenju, zaštiti na radu, zaštiti od požara i drugih relevantnih propisa.

Član 18.

- (1) Lista ugovornih izvođača se objavljuje na internet stranici distributera gasa i ista je dostupna svim zainteresovanim subjektima.
- (2) Sva dokumentacija o ugovornim izvođačima, koju čine: zahtjev privrednog subjekta sa priložima; zapisnici Komisije; zaključeni ugovori i druga akta nalazi se kod distributera gasa.
- (3) Distributer gasa aktom o osnivanju Komisije zadužuje lice iz reda zaposlenika distributera koje se stara o dokumentaciji iz prethodnog stava.

Član 19.

- (1) Nadzor nad radom ugovornog izvođača podrazumjeva provjeru statusa sa aspekta stručne, materijalne i organizacijske opremljenosti i poštivanja obaveza iz potpisanog ugovora.
- (2) Osim Komisije, nadzor nad radom ugovornog izvođača mogu da vrše i stručna lica distributera. Svaka provjera ugovornog izvođača se dokumentuje izradom zapisnika koji se dostavlja Komisiji na dalje postupanje.

Član 20.

Komisija analizira zapisnike o izvršenim provjerama ugovornog izvođača i u slučaju uočenog propusta ugovornog izvođača prilikom izvođenja radova, predlaže odgovarajuće mjere koje su popisane u članu 22. Pravilnika.

Član 21.

- (1) Povrede preuzetih obaveza u radu ugovornog izvođača, u skladu sa ovim pravilnikom i ugovorom o odnosima distributera i izvođača radova na gasnim instalacijama, podliježu izricanju mjera od strane Distributera.
- (2) Povrede obaveza iz prethodnog stava su:
 - 1. Neprisustvo odgovornog montera/odgovorne osobe za izvođenje radova u skladu sa podnesenom prijavom;
 - 2. Izvođenje radova na unutrašnjim gasnim instalacijama prije naznačenog termina u prijavi;
 - 3. Korištenje neadekvatne/nepropisne opreme i alata za izvođenje radova;
 - 4. Nesavjesno izvođenje radova (npr. nezaptivenost gasnih vodova, korištenje neadekvatne tehnologije spajanja gasnih vodova, neizvođenje otvora za dovod zraka

za sagorjevanje, neusklađenost projektovanog i izvedenog stanja koja utiče na funkcionalnost i sigurnost UGI, ugradnja materijala i gasnih aparata bez važećih certifikata i sl.);

5. Izvođenje radova izvan dodijeljenog radnog područja;
6. Neupoznavanje korisnika sa rukovanjem i održavanjem gasnih instalacija i uređaja pisanim putem;
7. Odstupanje od tehničkih pravila i pravila struke;
8. Odstupanje od uslova stručne ili materijalno – tehničke opremljenosti za dodijeljeno radno područje.

VI VRSTE MJERA I NJIHOVA PRIMJENA

Član 22.

Nakon provedenog postupka u kojem se utvrdi povreda obaveze iz člana 21. Pravilnika, Distributer može izreći jednu od sljedećih mjera:

1. Pismena opomena;
2. Suspenzija ovlaštenja za izvođenje radova;
3. Otkaz ugovora bez poštivanja otkaznog roka.

Član 23.

(1) Pismena opomena sadrži, zavisno od vrste povrede, i poziv da ugovorni izvođač o svom trošku i u roku koji odredi Distributer izvrši obaveze u skladu sa Pravilnikom i Ugovorom te da otkloni uočene nedostatke. Ugovorni izvođač je obavezan pisanim putem obavijestiti Distributera o postupanju po izrečenoj mjeri. Pismena opomena se izriče za sve povrede obaveza, koje ugovorni izvođač napravi prvi put, a koje su navedene u članu 21. stav 2.

(2) Suspenzija ovlaštenja za izvođenje radova izriče se uvijek kada se uoči nepostupanje ugovornog izvođača po prethodno izrečenoj pismenoj opomeni ili kada se utvrdi da ugovorni izvođač ponovi kršenje obaveza iz člana 21. Pravilnika. Suspenzija se izriče na period od 3 do 12 mjeseci. Za vrijeme važenja ove mjere ugovorni izvođač se briše sa Liste ugovornih izvođača. Ugovorni izvođač je obavezan pisanim putem obavijestiti Distributera o postupanju po izrečenoj mjeri.

Najkasnije 15 dana prije isteka perioda suspenzije, ugovorni izvođač je obavezan da se obrati distributeru u pisanoj formi uz prilaganje ovjerene izjave kojom potvrđuje da ispunjava uslove u skladu sa odredbama poglavlja III ovog Pravilnika. Komisija će zakazati stručni razgovor nakon čega će donijeti zaključak sa prijedlogom za vraćanje na Listu ugovornih izvođača.

(3) Otkaz ugovora bez poštivanja otkaznog roka Distributer izriče ugovornom izvođaču koji ne postupi po prethodno izrečenoj suspenziji. U slučaju izricanja ove mjere distributer neće uzimati u razmatranje eventualno podnijeti zahtjev privrednog subjekta za dodjelu radnog područja u periodu od 24 mjeseca od dana izricanja ove mjere.

(4) Distributer navedene mjere izriče u formi odluke. Ugovorni izvođač na izrečenu mjeru ima pravo žalbe Nadzornom odboru distributera u roku od 15 dana od dana prijema odluke. Žalba ne odlaže izvršenje odluke.

VII PRELAZNE I ZAVRŠNE ODREDBE

Član 24.

Distributer gasa provodi postupak imenovanja Komisije za dodjelu radnog područja 30 dana prije isteka mandata aktuelnog sastava Komisije.

Član 25.

(1) Ugovori koji su zaključeni po odredbama prethodnog Pravilnika ostaju na snazi do njihovog isteka.

(2) Ugovorni izvođač ima pravo raskida ugovora bez otkaznog roka pod uslovom da nema radova u toku niti obaveza po prethodno izvršenim radovima kod korisnika gasa.

Član 26.

Izmjene i dopune ovog pravilnika se vrše na način i po postupku predviđenom za njegovo donošenje.

Član 27.

Autentično tumačenje odredbi ovog Pravilnika daje organ koji ga je donio.

Član 28.

Ovaj pravilnik stupa na snagu osmog dana od dana objavljivanja na Oglasnoj ploči, a isti će biti objavljen i na web stanici i intranet mreži distributera.

Član 29.

Danom stupanja na snagu ovog pravilnika prestaje da važi Pravilnik o uslovima i postupku zaključivanja Ugovora sa privrednim subjektima koji rade na izgradnji i održavanju dijelova gasnog sistema broj:2635/14 od 09.12.2014.godine.

Broj: _____

Datum: _____

**PREDSJEDNIK
NADZORNOG ODBORA**

mr. Miralem Mrkonja, dipl. el. ing.

**Potvrda zakonitosti Pravilnika od
Strane kvalifikovanog lica pravne
Struke (član 19. ZJP FBiH)**

Arifa Osmanović

**Potvrda sadržaja Pravilnika od
Strane dipl.ing.maš**

Muhammed Halilagić (vođa tima za izradu Pravilnika)